


№ 1041 Prot.  
dt. 27. 02. 2018.

РЕПУБЛИКА МАКЕДОНИЈА  
АГЕНЦИЈА ЗА ЕЛЕКТРОНСКИ КОМУНИКАЦИИ  
СКОПЈЕ

Епоп 1806-911/1  
27.02.2018



Marrëveshje Bashkëpunimi midis

**AUTORITETI KOMBËTAR PËR CERTIFIKIMIN ELEKTRONIK DHE SIGURINË  
KOMPJUTERIKE (AKCESK)**

**AGJENCIA KOMBETARE E SHOQËRISË SË INFORMACIONIT (AKSHI)**

dhe

**AGJENCIA PËR KOMUNIKIMET ELEKTRONIKE TË REPUBLIKËS SË  
MAQEDONISË (AEC)**

**QENDRA KOMBËTARE PËR PËRGJIGJE NDAJ INCIDENTEVE KIBERNETIKE  
(MKD – CIRT)**

Këtej e tutje, Palët,

*Të Vetëdijshme* për rëndësinë e bashkëpunimit ndërinstitucional për të përmirësuar aftësitë mbrojtëse nëpërmjet shkëmbimit reciprok të informacionit mbi sigurinë kibernetike dhe

*Të Bindur* që ky bashkëpunim i ndërsjelltë do të rezultojë në një kontribut të efektshëm në këtë fushë;

*Me Dëshirën e Mirë* për të kontribuar në bashkëpunimin nëpërmjet zhvillimit të marrëdhënieve ndërmjet dy institucioneve;

*Duke Deklaruar* gatishmërinë e tyre në ndërmarrjen e aktiviteteve në kuadër të harmonizimit të legjislacionit dhe të zgjerimit të bashkëpunimit të tyre të ndërsjelltë në fusha me interes të përbashkët, duke krijuar kështu një kuadër dhe mjedis mbështetës bazuar në barazi, mos diskriminim, dhe në një baraspeshë të të drejtave dhe detyrimeve;

*Duke Riafirmuar* vendosmërinë e tyre për të kontribuar në mënyrë konstruktive dhe thelbësore në procesin e zbatimit të legjislacionit respektiv të institucioneve;

Kanë Vendosur, në ndjekje të këtyre objektivave, të konkludojnë Marrëveshjen e mëposhtme:

Neni 1  
Qëllimi

Palët do të bashkëpunojnë në fushat kryesore për të rritur informimin dhe shkëmbimin e informacionit në një infrastrukturë të hapur, ndërvepruese, të sigurt, dhe të besueshme duke pasur prioritet fushën e sigurisë kibernetike.

Neni 2  
Parimet dhe vlerat e bashkëpunimit

Të dy institucionet konfirmojnë që ndajnë të njëjtin qëndrim për sa i përket sigurisë kibernetike. Palët angazhohen të punojnë mbi parimin e reciprocitetit për të asistuar, bashkëpunuar, në fushën e sigurisë kibernetike, duke respektuar privatësinë e njëra-tjetrës.

Neni 3  
Angazhimet e palëve

Autoriteti Kombëtar për Certifikimin Elektronik dhe Sigurinë Kibernetike (AKCESK), Agjencia Kombëtare e Shoqërisë së Informacionit (AKSHI) dhe MKD-CIRT angazhohen që;

- Të bashkëpunojnë për trajtimin e incidenteve në hapësirën kibernetike.
- Të shkëmbejnë përvojat në fushën e sigurisë kibernetike dhe të krijojnë hapësira për pjesëmarrje në aktivitetet ndërkombëtare të fushës.
- Të vendosin në dispozicion programet dhe trajnimet që kanë qëllim ngritjen dhe avancimin e stafit të tyre.
- Të identifikojnë mundësitë për shkëmbime akademike dhe bashkëpunim në kërkim dhe zhvillim.

Neni 4  
Komunikimi i palëve

- Palët angazhohen të mbajnë një komunikim të vazhdueshëm ndërmjet tyre dhe të shkëmbejnë çdo informacion të nevojshëm për përmbushjen e detyrave të tyre. Komunikimi do të kryhet me e-mail.
- Palët do të caktojnë një person kontakti me njohuri të specializuara të fushës që do të jetë përgjegjës për zbatimin konkret të Marrëveshjes së Bashkëpunimit.
- Personat e kontaktit nga të dyja palët do të jenë të disponueshëm në çdo kohë për komunikimin dhe koordinimin e veprimeve me palën tjetër.

Neni 5  
Konfidencialiteti i informacionit

- Secila Palë do të sigurojë konfidencialitetin e informacionit të marrë nga Pala tjetër.
- Informacioni i marrë në kuadër të këtij Memorandumi nuk do t'u jepet palëve së treta pa lejen me shkrim të Palës që ka dhënë këtë informacion.

Neni 6  
Ndryshime

Marrëveshja mund të ndryshohet vetëm me miratimin e ndërsjelltë me shkrim të Palëve.

Neni 7  
Afati

Kjo marrëveshje lidhet me një afat të pacaktuar. Marrëveshja mund të përfundojë në çdo kohë. Përfundimi do të hyjë në fuqi me marrjen e njoftimit me shkrim nga Pala tjetër. Deri në përfundimin e kësaj Marrëveshjeje, Palët do t'u përmbahen detyrimeve që rrjedhin nga kjo Marrëveshje, përsa i përket informacionit dhe dokumenteve të shkëmbyera përpara datës së përfundimit të saj.

Neni 8  
Nënshkrimi dhe hyrja në fuqi

Kjo Marrëveshje do të hyjë në fuqi në datën e nënshkrimit nga Palët dhe do të jetë në fuqi derisa njëra prej Palëve të ketë njoftuar Palën tjetër me shkrim, 3 (tre) muaj përpara përfundimit të saj.

Nënshkruar në Tiranë, më 27/02/2018, në dy kopje origjinale, në gjuhën shqipe, maqedonase dhe angleze, duke qenë të gjithë tekstet njëloj autentike. Në rast të mosmarrëveshjeve në interpretim, teksti në gjuhën angleze do të ketë përparësi.

**AUTORITETI KOMBËTAR PËR  
CERTIFIKIMIN ELEKTRONIK  
DHE SIGURINË  
KOMPJUTERIKE (AKCESK)**

DREJTOR I PËRGJITHSHËM  
Dr. VILMA TOMÇO

**AGJENCIA KOMBËTARE E  
SHOQERISË SË  
INFORMACIONIT (AKSHI)**

DREJTOR I PËRGJITHSHËM  
Dr. MIRLINDA KARÇANAJ

**AGJENCIA PËR KOMUNIKIMET  
ELEKTRONIKE TË REPUBLIKËS  
SË MAQEDONISË (AEC)**

**QENDRA KOMBËTARE PËR  
PËRGJIGJE NDAJ INCIDENTEVE  
KIBERNETIKE (MKD – CIRT)**

DREJTOR

Z. SASHO DIMITRIJOSKI

Datë: 27.02.2018

Datë: 27.02.2018